

**SPRM: 500 ditangkap terbabit kes rasuah**  
**Malaysiakini.com**  
**Mar 16, 2010**

Seramai 500 orang, 38.2 peratus daripada mereka penjawat awam, ditangkap tahun lalu berhubung pelbagai kes rasuah.

Timbalan Ketua Pengarah (Pengurusan dan Profesionalisme) Suruhanjaya Pencegahan Rasuah Malaysia (SPRM), Datuk Zakaria Jaafar berkata, daripada 191 penjawat awam yang ditahan, dua adalah daripada kumpulan pengurusan tertinggi dan 29 daripada kumpulan profesional.

Selain itu, beliau berkata, 107 tangkapan membabitkan orang awam, 180 daripada swasta dan 22 ahli politik.

"Daripada 176 orang yang dihadapkan ke mahkamah, 89 terdiri penjawat awam, 46 orang awam, 27 daripada sektor swasta dan 14 ahli politik," katanya kepada pemberita selepas menyaksikan majlis serah tugas dan perpisahan Pengarah SPRM Pahang di Kuantan hari ini.

Datuk Sutinah Sutan yang sebelum ini memegang jawatan tersebut dinaikkan pangkat sebagai Timbalan Ketua Pengarah (Pencegahan) SPRM, manakala tempatnya diganti oleh Pengarah SPRM Selangor, Moh Samsudin Yusoff.

- Bernama

Copyright © 1999-2007 Mkini Dotcom Sdn. Bhd.  
Source : <http://www.malaysiakini.com/news/126693>